

南
北
史
合
注

欽定四庫全書

南北史合注卷一百五十四

明 李清 撰

北史六十八

楊纂

令狐整 子熙

柳敏 子昂

唐 永

王士良

崔彥穆字彥穆清河東武城人魏司空安陽侯林九世
孫祖蔚遭從兄司徒浩之難南奔江左仕宋為給事黃
門侍郎汝南義陽二郡守延興初復歸於魏拜潁川郡
守因家焉終郢州刺史父稚終永昌郡守彥穆幼明悟
神彩卓然魏吏部尚書隴西李神雋有知人鑒見而歎
曰王佐才也永安末再遷大司馬從事中郎孝武西遷
彥穆時不得從大統三年乃與兄彥珍舉義成臯攻拔
滎陽擒東魏郡守蘇叔仍與鄉郡王元洪威攻潁川斬

其刺史李景道即拜滎陽郡守十四年授散騎常侍司
農卿時軍國草創衆務殷繁周文乃引彥穆入幕府兼
掌文翰及於謹伐江陵彥穆以本官從平之周明帝時
累遷御正大夫陳氏請敦隣好詔彥穆使焉彥穆風韻
閑曠器度方雅善玄言解談謔甚為江表所稱轉戶部
中大夫天和三年聘齊還累遷小司徒及宣帝崩隋文
帝輔政三方起兵以彥穆為行軍總管與襄州總管王
誼攻司馬消難軍次荊州疑總管獨狐永業有異志遂

收而戮之及事平隋文帝徵王誼入朝即以彥穆為襄
州刺史總管六州諸軍事加授上大將軍累爵東郡公
頃之永業家自理得雪彥穆坐除名尋復官爵開皇元
年卒子君綽嗣君綽性夷簡博覽經史有父風

楊纂廣寧人父安仁魏朔州鎮將纂少慷慨有志畧勇
力兼人年二十從齊神武起兵信都以軍功稍遷武州
刺史自以賞薄志懷怨憤每歎曰大丈夫富貴何必故
鄉若以妻子經懷豈不沮人雄志大統初乃間行入關

周文執纂子曰人所貴者忠義所懼者危亡能不憚危
亡蹈忠義者今見之卿耳即授征南將軍大都督從周
文解洛陽圍經河橋却山之戰纂每先登軍中咸推其
敢勇累遷驃騎大將軍開府儀同三司加侍中賜姓莫
胡盧氏俄授岐州刺史周保定元年位大將軍累爵隴
東郡公除隴州刺史從隋公楊忠東伐至并州而還天
和六年進柱國大將軍轉華州刺史纂性質樸不識文
字前後蒞職但推誠信而已吏民以其忠恕頗亦懷之

尋卒於州

段永字永賓其先遼西石城人晉幽州刺史足礪後後徙高陸之河陽永幼有志操閭里稱之魏正光末六鎮擾亂遂携老幼避地中山後赴洛陽拜平東將軍青州人崔社客舉兵反永討平之除左光祿大夫時有賊魁元伯生西自靖潼東至鞏洛屠陷城壁所在為患孝武遣京畿大都督婁昭討之昭請以五千人行永進曰此賊既無城柵唯寇抄為資

周書曰安則蟻聚窮則鳥散

取之在速不在衆也若星馳電發出其不虞精騎五百足矣

周書曰若徵兵而往彼必遠竄雖大衆無所用

帝然其計命永代昭以五百騎倍道兼進遂破平之帝西遷永時不及從大統初乃結宗人潛謀歸款與都督趙業等襲斬西中郎將慕容顯和傳首京師授徐州刺史從擒竇泰復弘農破沙苑並有戰功封昌平縣公河

橋之役永力戰先登授西汾州刺史累遷驃騎大將軍
開府儀同三司賜姓爾綿氏廢帝元年授恒州刺史時
朝貴多其部人謁永之日冠蓋盈路時榮之周孝閔踐
祚進爵廣城郡公歷戶部中大夫保定四年拜大將軍
永歷任內外所在頗有聲稱輕財好士則朝野以此重
焉天和四年授小司寇尋為右二軍總管率兵北道講
武遇疾卒喪還武帝親臨贈使持節柱國大將軍同華
等五州刺史謚曰基

令狐整字延保敦煌人本名延世為西土冠冕父蚪早
以名德著聞歷郢州刺史魏大統末卒於家周文傷悼
之遣使者監護喪事敕鄉人為營墳壟贈龍驤將軍爪
州刺史整幼聰敏沉深有識量學藝騎射並為河右所
推刺史魏東陽王元榮辟整為主簿加盪寇將軍整進
趣詳推對揚辯暢謁見之際府州傾目榮器整德望嘗
謂僚屬曰令狐延保西州令望方成重器豈州郡之職
所可繫維但一日千里必基虎步吾當委以庶務畫諾

而已頃之孝武西遷河右擾亂榮杖整防扞州境獲寧
及鄧彥竊據瓜州拒不受代整與開府張穆等密應使
者申徽執彥送京師周文嘉其忠節表為都督尋城民
張保又殺刺史成慶與涼州刺史宇文仲和構逆規據
河西晉昌人呂興等復害郡守郭肆以郡應保初保等
將圖為亂慮整守義不從既殺成慶因欲及整以整民
望復恐其下叛之遂不敢害雖外加禮敬內甚忌整整
亦偽若親附密欲圖之令所親說保曰君與仲和結為

唇齒今東軍漸逼涼州彼勢孤危恐不能敵若或摧衄則禍及此土宜分遣銳師星言救援二州合勢則東軍可圖然後保境息民計之上者保然之未知所任整又令說保曰歷觀成敗在於任使所擇不善旋致傾危令狐延保兼資文武才堪統御若使為將蔑不濟矣保納其計且以整父兄等並在城弗之疑也遂令整行整至玉門郡召集豪傑說保罪逆馳還襲之先定晉昌斬呂興進軍擊保州人素服整威名並棄保來附保遂奔吐

谷渾衆議推整為刺史整曰本以張保肆逆殺害無辜
閩州俱陷不義今者同心務在除凶若相推薦復恐效
尤致禍乃推波斯使主張道義行州事具以狀聞詔以
申徽為刺史徵整赴闕授壽昌郡守封襄武縣男周文
謂整曰卿早建殊勲今官位未足酬賞方當與卿共平
天下同取富貴遂立為瓜州義首整以國難未寧常願
舉宗効力遂率鄉親二千餘人入朝隨暉征討整善於
撫馭躬同豐約是以士衆並忘羈旅盡其力用周文嘗

從容謂整曰卿遠祖立忠而去今卿立忠而來可謂積
善餘慶世濟其美整遠祖漢建威將軍邁不為王莽屈
其子稱避地河右故周文稱之累遷驃騎大將軍開府
儀同三司加特中周文又謂整曰卿勲同婁項義等骨
肉立身敦雅可以範人遂賜姓宇文氏并賜名整宗人
二百餘戶並列屬籍周孝閔踐阼拜同憲中大夫處法
平允為當時所稱進爵彭城縣公初梁興州刺史席固
以州來附周文以固為豐州刺史固蒞職既久猶習梁

法凡所施為多虧政典朝議密欲代之而難其選令整
權鎮豐州委以代固之略整廣布威恩傾身撫接數月
間化洽州府於是除整豐州刺史以固為湖州豐州舊
治不居人民賦役參集勞逸不均整請移居武當詔可
其奏獎勵撫導遷者如歸旬月間城府周備固之遷也
其部曲皆願留整左右整諭以朝制弗許莫不流涕而
去及整秩滿代至民吏戀之老幼送整遠近畢集數日
停留方得出界拜御正冲大夫兩遷始州刺史整雅識

情偽尤明政術恭謹廉慎常懼盈滿故歷居內外所在
見稱進大將軍晉公護初執政欲委整以腹心整辭不
敢當頗忤其意護以此疎之及護誅附會者咸伏法而
整獨保全時稱其洗讐卒贈本官加四州諸軍事鄜州
刺史謚曰襄子熙嗣熙子張熙性嚴重有雅量雖在私
室終日儼然不妄通賓客凡所交結必一時名士博覽
羣書尤明三禮善騎射頗知音律起家以通經為吏部
上士轉夏官府上士士俱有能名以母憂去職不勝哀

其父戒之曰大孝在于安親義不絕嗣吾今見存汝又
隻立何得過爾毀頓貽吾憂也熙自是稍加饘粥服闋
除少駕部復丁父憂非杖不起人聞其哭聲莫不下泣
河陰之役詔令墨衰從事授職方下大夫襲彭城縣公
及武帝平齊以留守功進儀同歷司勳使部二曹中大
夫甚有當時譽隋文帝受禪除司徒左長史加上儀同
進爵河南郡公時吐谷渾寇邊以行軍長史從元帥元
諧討之以功進上開府後拜滄州刺史在職數年風教

大洽稱為良二千石開皇四年帝幸洛陽熙來朝吏民
恐其還陽悲泣於道及還百姓出境迎謁歡叫盈路在
州獲白鳥白鷹嘉麥甘露降于庭前柳樹八年徙為河
北行臺度支尚書吏民追思泣碑頌德及行臺廢累遷
鴻盧卿後以本官兼吏部尚書往判五曹尚書事號為
明幹帝甚任之及祠太山還次汴州惡其殷盛多有姦
俠以熙為汴州刺史下車禁游食抑工商民有向街開
門者杜之舟客停於郭外星居者勒為聚落僑人遂令

歸本滯獄並決遣之令行禁止帝聞而嘉之顧侍臣曰
鄴都天下難臨處敕相州刺史豆盧通令習熙法其年
來朝考績為天下最賜帛三百疋頒告天下以嶺南夷
數起亂徵拜桂州總管十七州諸軍事許以便宜從事
刺史以下官得承制補授給帳內五百人帛五百疋發
傳送其家累改武康郡公熙至部大弘恩信其溪洞渠
帥更相謂曰前總管皆以兵威相脅今以手教相諭我
輩其可違乎相率歸附先是州縣生梗長吏多不得之

官寄政于總管府熙悉遣之為建城邑開設學校民夷
感化時有竄猛力者與陳後主同日生自言貌有貴相
在陳世已據南海平陳後文帝因撫之即拜安州刺史
然驕倨時險未嘗參謁熙手書諭之申以交友之分其
母有疾熙復遣以藥猛力感之詣府請謁不敢為非熙
以州縣多有同名於是奏改安州為欽州黃州為峯州
利州為智州德州為驩州東寧州為融州皆從之在職
數年以老疾表請解任優詔不許賜以醫藥熙奉詔令

交州渠帥李佛子入朝佛子欲為亂請至仲冬就道熙
意在羈縻遂從之有人詣闕訟熙受佛子賂而捨之帝
聞佛子反問至大怒以為信然遣使鎖熙詣闕熙性素
剛鬱鬱不得志行至永州憂憤病卒帝怒不解沒其家
財及行軍總管劉方擒佛子送京師言熙寔無贓帝悟
乃召其四子聽仕少子德榮最知名整弟休幼聰敏有
文武材與整同起兵逐張保授帥都督後為中外府樂
曹參軍時諸幼臣多為本州刺史晉公護謂整曰以公

熱望應得本州但朝廷藉公委任無容遠出然公一門
內須有衣錦之榮乃以休為敦煌郡守在郡十餘年甚
有政績卒於合州刺史

唐永北海平壽人父倫青州刺史永身長八尺少耿介
有將帥才讀班超傳慨然有萬里之志正光中為北地
太守當郡別將俄賊將宿勤明達車金雀等寇郡境永
擊破之境內稍安永善馭下士人競為用臨陣常著帛
展襦把角如意以指麾處分辭色自若在北地四年與

賊數十戰未常敗北時人語曰莫陸梁逢唐將永所營處至今猶稱唐公壘也行臺蕭寶夤表永為南幽州刺史夷人送故者莫不垂淚當路遮留相隨數日始得出境大統元年拜東雍州刺史尋加衛將軍封平壽伯卒贈司空公永性清廉家無蓄積妻子不免飢寒世以此稱之子陵少習武藝頗閑吏職位車騎大將軍儀同三司陵子恪美風儀博涉經史文辭可觀周大象中頗被宣帝任遇位至內史下大夫漢陽公隋文帝得政廢於

家而卒陵弟瑾字附璘

金石錄載瑾碑云字子玉

性溫恭有器量博涉經史雅好屬文身長八尺二寸容貌甚偉年十七周文聞其名乃貽永書曰聞公有二子曰陵曰瑾陵從橫多武略瑾雍容富文雅可並遣入朝孤欲委以文武之任因召拜尚書員外郎相府記室參軍事軍書羽檄瑾多掌之從破沙苑戰河橋並有功累遷尚書右丞吏部郎中時魏室播遷庶務草創朝章國

典瑾並參之遷戶部尚書進驃騎大將軍開府儀同三司賜姓宇文氏時燕公于謹勲高望重朝野所屬白周文言瑾學行兼修願與同姓結為兄弟庶子孫承其餘論有益義方周文歎異久之更賜瑾姓萬紐于氏謹乃深相結納敦長幼之序瑾亦誕羅子孫行弟姪之敬其為朝望所宗如此進爵臨淄縣伯轉吏部尚書銓綜銜流雅有人倫鑒以父憂去職尋起令視事時六尚書皆一時之秀周文自謂得人號六俊然瑾尤見器重于謹

南伐江陵以瑾為元帥府長史軍中謀略多出瑾焉江陵既平衣冠仕伍並沒為僕隸瑾察其才行有片善者輒議免之賴瑾獲濟者甚衆時論多焉及軍還諸將多因剽掠大獲財物瑾一無所取惟得書兩車載歸或白周文曰唐瑾大有輜重悉梁朝珍玩周文初不信然欲明其虛寔遣使檢閱惟墳籍而已乃歎曰孤知此人二十許年明其不利干義向若不令檢視恐常人有投杼之疑所以益明之耳凡受人委任當如此也論平江

陵功爵姑臧縣公亦官建授禮部中大夫出為蔡州刺史歷拓州硤州所在皆有德化民吏稱之轉荊州總管府長史入為吏部中大夫歷御正納言內史中大夫曾未十旬遂遷四職指紳咸以為榮卒於同宗中大夫兼內史贈小宗伯謚曰方

金石錄載碑云謚曰懿碑于志寧撰貞觀中其孫皎所立後周書北史皆唐初脩距瑾之卒歲月未久而錯謬如此當以碑為據

瑾性方重有風格退朝休暇恒著衣冠對妻子遇迅雷
風列雖聞夜晏寐必起冠帶端笏危坐又好施與家無
餘財所得祿賜常散之宗族其尤貧乏者又割膏腴田
宅振之所遺子孫者並境垆朝野以此稱之撰新儀十
篇所著賦頌碑誄二十餘萬言孫大智嗣瑾次子令則
性好篇章兼解音律文多輕艷為時人所傳仕隋位太
子左庶子太子勇廢被誅

柳敏字白澤河東解縣人晉太常純七世孫父懿魏車

騎大將軍儀同三司汾州刺史敏九歲孤事母以孝聞
性好學涉獵經史陰陽卜筮之書靡不究習年未弱冠
起家員外散騎侍郎累遷河東郡丞朝議以敏本邑故
有此授敏雖統御鄉里而處物平允甚得時譽及周文
克復河東見而器異之謂曰今日不喜得河東喜得卿
也即拜丞相府參軍事俄轉戶曹參軍兼記室每有四
方賓客恒令接之吉凶禮儀亦令監綜又與蘇綽等修
撰新制為朝廷政典遷禮部郎中累進大都督遭母憂

居喪旬日間賓髮半白尋起為吏部郎中毀瘠過禮杖而後起周文見而歎異之特異稟賜及尉遲迴伐蜀以敏為行軍司馬軍中籌略並委之益州平累進尚書賜姓宇文氏周孝閔踐阼除河東郡守尋復徵拜禮部出為郢州刺史甚得物情及將還朝夷夏士人感其惠政並齎酒餽及物產候之於路敏乃從化道還復拜禮部後改禮部為司宗仍以敏為之敏操履方正性又恭勤每日將朝必夙興待旦久處臺閣明練故事近儀或乖

先典者皆案據舊章刊正取中遷小宗伯監修國史轉
小司馬又監修律令進大將軍武帝平齊累進爵至武
德郡公敏自建德後寢疾積年武宣二帝並親幸其第
問疾隋開皇元年進上大將軍太子太保其年卒贈五
州諸軍事晉州刺史臨終戒其子等喪事所須務從簡
約其子涕泣奉行少子昂字千里幼聰穎有器識幹局
過人周武帝時為內史中大夫開府儀同三司當途用
事百寮皆出其下昂竭誠獻替知無不為謙虛自處未

嘗驕物時論重之武帝崩受遺輔政稍被宣帝疎然不
離本職隋文帝為丞相深自結納以為大宗伯拜日遂
得偏風不能視事文帝受禪疾愈加上開府拜潞州刺
史昂見天下無事表請勸學行禮帝覽而善之優詔答
昂

隋書載昂表曰臣聞帝王受命建學制禮故能風成
惟新自魏道將謝關右山東久為戰國救焚拯溺無
暇從容晚世因循遂成澆散自非上哲挺生則儒雅

之道經禮之制莫肯用心陛下稽典改弊因情緣義
為其節文然儒風尚墜禮教猶微臣恐業淹事緩動
延年世若行禮勸學道教相催必當靡然向風不遠
而就家知禮節人識義方比屋可風輒謂非遠上覽
而善之詔見本紀

自是天下州縣皆置博士習禮昂在州甚有惠政卒官
子調歷秘書郎侍御史左僕射楊素嘗於朝堂見調因
獨言曰柳條通體弱獨搖不須風調飲版正色曰調信

無取公不當以為侍御信有可取不應發此言公當具
贍之地樞機何可輕發素甚奇之煬帝嗣位累遷尚書
右司郎中時王綱不振朝士多贓貨唯調清素守常為
時所美然幹用非其所長

王士良字君明其先太原晉陽人後避地涼州魏太武
平阻渠氏因家於代父延蘭陵郡守士良少脩謹不妄
交遊孝莊末爾朱仲遠啓為府參軍事歷大行臺郎中
諫議大夫後與紇豆陵步藩交戰軍敗為藩所擒遂居

河右偽行臺紇豆陵伊利欽其才擢授右丞妻以孫女
士良既為姻好便得盡言遂曉以禍福伊利等即歸附
朝廷嘉之太昌初累遷爵琅邪縣侯王思政鎮潁川齊
文襄率衆攻之授士良大行臺左丞加鎮西將軍進爵
為公令輔其弟演於并州居守齊文宣即位累遷至侍
中吏部尚書士良少孤事繼母梁氏以孝聞及卒居喪
合禮尋起令視事士良屢表陳誠再三不許方應命帝
見其毀瘠乃許之卧疾歷年帝每自臨視疾愈除滄州

刺史乾朔初徵還鄴授儀同三司孝昭即位遣三道使
搜揚人物士良與尚書令趙郡王高叡太常卿崔昂分
行郡國但有一介之善無不以聞齊武成初累加開府
儀同三司出為豫州道行臺豫州刺史保定四年晉公
護東伐權景宜以山南兵圍豫州士良舉城降授大將
軍小司徒賜爵廣昌郡公尋除荊州總管行荊州刺史
三遷復為荊州刺史士良去鄉既久忽臨本州耆老故
人猶有存者遠近咸以為榮加授上大將軍以老病乞

骸許之開皇元年卒時年八十二

論曰昔陽貨外叛庶其竊邑而春秋譏之韓信背項陳
平歸漢而史遷美之蓋以運屬既安君道已著則徇利
忘德者罪也時逢擾攘臣禮未備則轉禍為福者可也
崔彥穆楊纂段永等昔在山東沈淪下位並以羈旅遭
回燕雀之伍終佩龜組可謂見機者乎令狐整幹用確
然雅望重於河右處州里則勲著方隅升朝廷則績宣
出內而畏避權寵克保終吉不然何以自致顯名而取

高位也熙歷職流譽風政克舉雖古之循吏何以加茲
而毫釐為爽邱山成過命也夫唐永良能之名所在著
美清白之譽顯於累職所謂幹能之士也瑾敏並挺杞
梓之材蘊瑚璉之器博觀載籍多識舊章國之名臣時
之領袖周無君子斯焉取斯王士良仕齊職居卿牧而
失忠與義臨難苟免其背叛之徒歟

南北史合注卷一百五十四

欽定四庫全書

南北史合注卷一百五十五

明 李清 撰

列傳第五十七

北史六十九

豆盧寧 子勣 孫毓揚 紹 子雄

王 雅 子世積 韓 雄 子捨虎

賀若敦 子弼 弟 誼

豆盧寧字永安昌黎徒何人前燕北地王慕容精之後

高祖勝歸魏授長樂郡守賜姓豆盧氏或云北人謂歸義為豆盧因氏焉父萇魏柔玄鎮將有威重見稱於時寧少驍果有志氣身長八尺美姿容善騎射永安中以別將隨爾朱天光入關破万俟醜奴嘗與梁人公定遇於平涼川相與肄射乃相去百步懸莎草射之七發五中公定服其能贈遺甚厚天光敗從侯莫陳悅及周文討悅寧與李弼來歸從擒竇泰復弘農破沙苑除衛大將軍兼大都督大統七年從于謹破稽胡帥劉平伏於

上郡及梁公定反以寧為軍司監隴右諸軍事賊平進
侍中使持節驃騎大將軍開府儀同三司九年從周文
迎高仲密與東魏戰於印山遷左衛將軍十六年拜大
將軍羌帥傍乞鐵公及鄭五醜等叛寧討平之恭帝二
年遷尚書右僕射周孝閔踐阼授柱國大將軍武成初
遷大司寇封楚國公邑萬戶保定四年授岐州刺史屬
大兵東討寧與疾從軍卒於同州贈太保十州諸軍事
同州刺史謚曰昭初寧未有子養弟永恩子勣及生子

讚親屬皆請讚為嗣寧曰兄弟之子猶子吾何擇焉遂以勣嗣時以此多之及寧薨勣襲爵勣字定東生時周文親幸寧家稱慶時遇新破齊軍周文因字曰定東勣聰悟有器局周孝閔受禪封丹陽郡公明帝時為左武伯中大夫勣自以經業未通請解職遊露門學帝嘉之敕以本官就學齊王憲納勣妹為妃恩禮愈厚武帝嗣位渭源燒當羌因饑作亂以勣有才畧拜渭州刺史甚有惠政華夷悅服大致祥瑞鳥鼠山谷呼為高武隴其

下渭水所出。絕壁千尋。由來乏水。諸羌苦之。勸馬足
所踐。忽飛泉涌出。有白鳥翔止廳前。孔子方去。有白狼
見於襄武人。為之謠曰。我有丹陽山。出玉漿。濟我民夷。
神鳥來翔。百姓因號其泉曰玉漿泉。後得父艱。毀瘁過
禮。襲爵楚國公。大象二年。拜柱國。隋文帝為丞相。益州
總管王謙舉兵。勸嬰城固守。謙將達奚悉等攻之。起土
山鑿城為七十餘穴。堰江灌之。勸時戰士不過二十。晝
夜相拒。經四旬。

隋書曰出奇兵擊之斬級數千降二千人

梁虜軍且至碁解去授上柱國賜一子爵中山縣公開
皇中為夏州總管帝以其家貴盛勲効克彰後為漢王
諒納其女為妃恩遇彌厚七年追守利州功詔食始州
臨津縣邑千戶十年以疾徵還京師詔諸王並至勅第
中使顧問道路不絕卒謚曰襄子賢嗣次子毓字道生
少英果有氣節漢王諒出鎮并州毓以妃兄為王府主
簿征突厥有功授儀同三司煬帝即位諒納諮議王頊

謀作亂毓苦諫不從因謂弟懿曰吾匹馬歸朝自得免
禍此乃身計非為國也今且偽從以思後計毓兄顯州
刺史賢言於帝曰臣弟毓素懷志節必不從亂但逼兇
威不能克遂臣請從軍與毓表裏諒不足圖也帝許之
賢密遣人齎敕書至毓所與計諒將往介州令毓與總
管屬朱濤留守毓與濤議拒之

隋書載毓謂濤曰漢王構逆敗不旋踵吾豈坐受夷
滅孤負家國耶當與卿出兵拒之

濤拂衣不從毓追斬之時諒司馬皇甫誕以諫避囚毓出之與協計及開府盤石侯宿勤武等

隋書載同謀者開府宇文昌儀同成端長孫愷車騎安成侯元世雅原武令皇甫文顯等五人

閉門拒諒部分未定有人告諒諒攻之

隋書曰毓見諒至紿其衆曰此賊軍也諒攻城南門毓特遣稽胡守堞稽胡不識諒矢下如雨諒至西門守兵皆并州人素識諒即開門納之

城陷見害時年二十八諒平

詔稱毓深識大義不顧姻親去逆歸順忘身殉義
贈大將軍封正義縣公謚曰愍

唐書曰高宗永徽三年詔求毓後官之

子願師嗣

或曰毓不得改列節義何也曰煬帝弑父與君正名
仗義討之可矣諒師固屬無名毓死豈盡義舉仍舊
以此

讚以寧勲建德初累遷開府儀同大將軍進爵武陽郡公永恩少有識度與寧俱歸周文屢從征討皆有功周孝閔踐阼改封沃野縣公保定元年為司會中大夫寧封楚國公請以先封武陽郡三千戶並沃野之封詔許焉卒於官贈少保謚曰敬子通嗣隋開皇初進爵南陳郡公尚文帝妹昌樂長公主厯定相二州刺史夏洪二州總管並以寬惠稱

楊紹字子安弘農華陰人父國中散大夫紹少慷慨有

志畧屢從征伐力戰有功大統四年為鄜城郡守紹性
恕直兼有威惠百姓安之

周書曰稽胡屢為邊患紹討之匹馬先登破之於默
泉之上從大將軍達奚武征漢中梁宜豐侯蕭循固
守梁州紹以為懸軍敵境圍守堅城曠日持久糧餉
不繼城中若致死于我懼不能歸請為計誘之乃頻
至城下挑戰設伏以待循初不肯出紹又遣人罵辱
之循怒果出兵紹率衆偽退城降又從燕國公于謹

圍江陵紹戰于批杷門流矢中股力戰不衰 愚按
周書紹率衆偽退以下必有脫簡今姑仍之

賜姓叱呂引氏周孝閔踐阼進爵儻城郡公位大將軍
卒贈成文等八州刺史謚曰信子雄嗣雄初名惠美姿
容有器度雍容閑雅進止可觀武帝時為太子司旅下
大夫帝幸雲陽宮衛王直作亂襲肅章門雄逆拒破之
遷右衛止大夫大象中進爵邦國公隋文帝為丞相雍
州牧畢王賢陰圖之雄時為別駕知其謀密告文帝賢

遇害

本史作畢王賢作難又云賢伏誅今皆改正之

以功授柱國雍州牧仍領相府虞候周宣帝葬備諸王
有變令雄率六千騎送至陵所進上柱國文帝受禪累
遷右衛大將軍參預朝政封廣平王以邦公別封一子
雄請封弟士貴朝廷許之或奏高頴朋黨帝言於朝雄
深明其虛

周書載雄曰頴用心平允奉法而行此乃愛憎之理

惟陛下察之

帝亦以為然雄時貴寵冠絕一時與高潁虞慶則蘇威稱四貴雄寬容下士朝野顧屬帝陰忌之不欲其典兵馬乃改授司空外示優崇內實奪其權也雄乃閉門不通賓客尋改封清漳王仁壽初帝以清漳不允聲望命職命進地圖指安德郡示羣臣曰此號名德相稱改封安德王大業初授太子太傅元德太子薨屢遷懷州刺史京兆尹帝親征吐谷渾詔雄總管澆河道諸軍及還

改封觀王遼東之役又檢校左翊衛大將軍出遼東道
次瀘河鎮遘疾卒帝為廢朝有司請謚懿帝曰王道高
雅俗德冠生靈乃謚曰德贈司徒襄國等十郡太守子
緄性和厚頗有文學厯淮南太守及父卒起為司隸校
尉遼東之役揚玄感反其弟玄縱自帝所逃赴其兄路
逢緄緄避人偶語久之司隸刺州劉休文奏之時恭仁
將兵於外帝寢其事緄憂發病卒雄弟達字士達有學
行仕周位儀同內史下大夫文帝受禪累遷內史侍郎

鄩鄭趙三州刺史俱有能名平陳後帝差品天下牧宰
達為第一擢拜工部尚書加上開府達為人弘厚有局
度楊素每日有君子貌兼君子心者唯楊達耳獻后及
文帝山陵制度達並參預煬帝嗣位轉納言遼東之役
領右武衛將軍進左光祿大夫卒於師贈吏部尚書始
安侯謚曰恭

王雅字度容閬熙新固人少沈毅木訥寡言有膽勇善
騎射周文聞其名召入軍從擒竇泰於潼關沙苑之戰

雅謂所部曰彼軍殆有百萬今我不滿萬人常理論之
實難與敵但相公神武以順討逆豈計衆寡大丈夫不
以此時破賊何用生為乃擐甲出戰所向披靡周文壯
之又從戰印山時大軍未利諸將皆退雅獨拒之敵人
見其無繼步騎競進雅左右奮擊斬九級敵衆稍退雅
乃還周文歎曰王雅舉身悉是膽也進爵居庸縣伯累
遷驃騎大將軍開府儀同三司明帝初除汾州刺史勵
精為政民庶悅附自遠至者七百餘家卒於夏州刺史

子世積嗣世積容貌魁岸腰帶十圍風神爽拔有人傑
之表在周以功拜上儀同高頔美其才能甚善之嘗謂
頔曰吾輩俱周臣子社稷淪沒若何頔深拒之隋文受
禪進封宜陽郡公授蘄州總管平陳之後以舟師自蘄
水趨九江

隋書曰與陳將紀瑱戰于蘄口大敗之

進柱國荊州總管後桂州人李光仕作亂世積以行軍
總管討平之進上柱國甚見隆重世積見帝忌刻功臣

多獲罪由是縱酒不與執政言及時事帝謂有酒疾舍之官內令醫者療之世積詭稱疾愈始得就第及煬帝征遼東世積與漢王並為行軍元帥至柳城遇疾還拜涼州總管令騎士七百人送之官未幾其親信安定皇甫孝諧有罪吏捕之亡抵世積世積不納由是有憾孝諧竟配防桂州事總管令狐熙熙又不之禮甚困窮因數幸上變稱世積嘗令道人相其貴否道人云當為國主謂其妻曰夫人當為皇后又將之涼州其所親謂世

積曰河西天下精兵處可圖大事世積曰涼州土曠人
稀非用武國由是被徵案其事有司奏左衛大將軍元
昊右衛大將軍元胄左僕射高頗並與世積交通受其
名馬之贈世積竟坐誅昊胄等免官拜孝諧為上大將
軍

韓雄字木蘭河南東垣人少敢勇膂力絕人工騎射有
將率材畧及西武西遷雄便慷慨有立功志大統初與
其屬六十餘人於洛西舉兵數日間衆至千人與河南

行臺楊琚共為掎角每抄掠東魏所向克獲東魏洛州刺史韓賢以狀聞鄴乃遣其軍司慕容紹宗與賢合勢討雄戰數十合雄衆略盡兄及妻子皆為賢獲將以為戮乃遣人告雄皆免之

周書載賢遣人告雄曰若雄至皆免之雄與其所親謀曰雄奮不顧身本望上申忠義下榮親戚若忍而不赴人謂我何既免後更思其計未晚也

雄乃詣賢軍隨賢還洛潛引賢黨謀欲襲之事洩遁免

謁周文於弘農封武陽縣侯遣還鄉里更圖進取雄乃
招集義衆從獨孤信入洛陽卽山之役周文命雄邀齊
神武於隘道神武怒命三軍并力取雄雄突圍得免除
東徐州刺史東魏東雍州刺史郭叔畧接境頗為邊患
雄密圖之輕將十騎夜入其境伏於道側都督韓仕於
畧城東服東魏人衣服詐若自河陽叛投關西者畧出
馳之雄自後射之每發咸中遂斬畧首除河南尹尋進
驃騎太將軍開府儀同三司侍中河南邑中正周孝閔

踐阼進爵新義郡公賜姓宇文氏明帝二年除都督中
州刺史雄久在邊具知敵人虛實每率衆深入不避艱
難前後經四十五戰雖時有勝負而雄志氣益壯東魏
深憚之卒於鎮贈大將軍五州諸軍事謚曰威子擒虎
嗣

隋書作擒虎本史去虎字避唐諱也今正之

擒虎字子通少慷慨以膽畧稱容貌魁岸有雄傑之表
性又好書經史百家皆畧知大旨周文見而異之令與

諸子遊集以軍功稍遷儀同三司襲爵新義郡公武帝
伐齊擒虎說下獨孤永業於金墉城及平范陽加上儀
同隋文帝作相遷和州刺史陳將甄慶任蠻奴蕭摩訶
等共為聲援頻寇江北前後入界擒虎屢挫其鋒陳人
奪氣開皇初文帝潛有吞江南志拜擒虎廬州總管委
以平陳之任甚為敵憚及大舉伐陳以擒虎為先鋒擒
虎領五百人宵濟襲采石守者皆醉遂取之進次姑熟
半日而拔次新林江南父老素聞其威信來謁軍門晝

夜不絕其將樊巡魯世真田端等相繼降晉王遣行軍
總管杜彥與擒虎合軍陳後主遣領軍蔡徵守朱雀航
聞擒虎將至衆懼而憤任蠻奴為賀若弼所敗棄軍降
擒虎擒虎以精騎直入朱雀門陳人欲戰蠻奴擒之曰
老夫尚降諸軍何事衆皆散走遂平金陵執陳主時賀
若弼亦有功下詔晉王曰二公深謀大畧東南遁寇朕
本委之悉如朕意

隋書曰平定江表二人力也

又下優詔於擒虎弼曰中國威於萬里宣朝化於一隅使東南之人俱出湯火數百年寇旬日廓清公等功也班師凱入誠知非遠相思之甚寸陰若歲及至京弼與擒虎爭功於上前弼曰臣在蔣山死戰破其銳卒擒其驍將震揚威武遂平陳國擒虎略不交陣豈臣之比擒虎曰本奉明旨令臣與弼同取偽都弼敢先期逢賊遂戰致將士傷死甚多臣以輕騎五百兵不血刃直取金陵降任蠻奴執陳叔寶據其府庫傾其巢穴弼至夕方

扣北掖門臣啓關納之赦罪不暇安得比臣帝曰二將
俱合上勲進擒虎上柱國賜物八千段有司劾擒虎縱
士卒淫汙陳宮坐此不得國公及真食邑大軍之始出
也帝敕有司曰亡國物我一人不入府可於苑內築五塼
當悉賜文武百官大射以取之及是帝御立堂大列陳
之奴婢貨賄會王公文武官七品已上武職領兵都督
已上及諸考使射之先是江東謠曰黃斑青驄馬發自
壽陽渚來時冬氣未去日春風始發不知所謂擒虎本

名豹

本史豹作禽武今從隋書

平陳之際又乘青驄馬往返時節與歌相應至是方悟
後突厥來朝帝謂曰汝聞江南有陳國天子乎對曰聞
之命左右引突厥詣擒虎前曰此孰得陳國天子者擒
虎厲然顧之突厥惶恐不敢仰視其威容如此別封壽
光縣公真食千戶以行軍總管屯金城禦備胡寇即拜
涼州總管俄徵還京恩禮殊厚無何其隣母見擒虎門

下儀衛甚盛有同王者母異而問之其中人曰我來迎
王忽不見又有人疾篤忽驚走至擒虎家曰我欲謁王
左右問何王曰閼羅王擒虎子弟欲撻之擒虎止之曰
生為上柱國死作閼羅王足矣因寢疾卒子世諤嗣世
諤倜儻驍捷有父風楊玄感亂引為將

資治通鑑曰擒虎子世諤觀王雄子恭道虞世基子
柔來護兒子淵裴蘊子爽大理卿鄭善果子儼周羅
暉子仲等四十餘人皆降於玄感

欽定四庫全書

卷一百五十五

每戰先登立感敗為吏所拘時帝在高陽送詣行在所
世謬日令守者大市酒殺飲餒甚暢揚言曰吾死在朝
夕不醉何為漸以酒進守者守者押之遂飲令醉因逃
奔山賊不知所終擒虎母弟僧壽字立慶亦以勇烈知
名周武帝時為侍伯中旅下大夫隋文帝得政從章孝
寬平尉遲迴以功授大將軍開皇初拜安州刺史時擒
虎為廬州總管朝廷不欲其兄弟同在淮南轉熊蔚二
州刺史進爵廣陵郡公尋以行軍總管擊破突厥於雞

頭山後坐事免數歲復拜蔚州刺史突厥甚憚之後檢
校靈州總管事從楊素破突厥進上柱國煬帝即位封
新蔡郡公自是不復任用大業五年從幸太原時有京
兆人達奚通妾王氏能清歌朝臣多相命觀之僧壽亦
預坐除名尋命復位卒于京僧壽弟洪字叔明少驍勇
善騎射膂力過人仕周以軍功拜大都督隋文帝為丞
相從章孝寬破尉遲迥加上開府及帝受禪封甘棠縣
公平陳之役授行軍總管及陳平晉王廣大獵於蔣山

有猛虎在園中衆皆懼洪馳馬射之應弦而倒陳氏諸將列觀皆為數服王大喜賜縑百匹尋以功加柱國拜廉州刺史時突厥屢為邊患朝廷以洪驍勇令檢校朔州總管事拜代州總管仁壽元年突厥達頭可汗犯塞洪率蔚州刺史劉隆大將軍李藥王拒之遇鹵於恒安衆寡不敵洪四面搏戰身被重鎗將士沮氣鹵悉衆圍之矢下如雨洪偽與鹵和園少懈洪率所領潰圍而出死者大半殺鹵亦倍洪及藥王除名隆竟坐死煬帝北

巡至恒安見白骨被野以問侍臣對曰是韓洪往與南
戰處也帝憫然傷之敕改葬命五郡沙門為設齋供拜
洪隴西太守未幾朱崖人王萬昌作亂詔洪平之以功
加金紫光祿大夫領郡如故俄萬昌弟仲通復叛又詔
洪平之還師遇疾卒

賀若敦

魏內八諸姓有賀若氏孝文因而不改

河南洛陽人其先居漠北世為部落大人曾祖貸魏獻

文時入國為都官尚書父統勇健不好文學以祖蔭為
祕書郎齊神武初起以統為潁川長史執刺史田迅以
州降

周書曰敦至長安魏文帝謂統曰卿自潁川從我何
日能忘

賜爵當亭縣公厯北雍恒二州刺史卒贈司空公謚曰
哀敦少有氣幹統將執田迅慮事不果又以累弱既多
難以自救沉吟久之敦年十七進策贊成其謀

周書載敦進策曰大人往事葛榮又入爾朱今高歡
所以委任無異於前者正因天下未定方藉英雄之
力耳一旦清平豈能相容恐將來有危亡之憂願思
全身遠害無顧念也

統流涕從之遂定謀歸西魏時羣盜蜂起大龜山賊張
世顯潛來襲統敦挺身赴戰手斬七八人賊乃走統大
悅謂左右僚屬曰我少從軍旅戰陣非一如此兒年時
膽畧者未見其人非惟成我門戶亦當為國名將明年

從河內公獨孤信於洛陽被圍敦彎三石弓矢不虛發
信大奇之言於周文引至麾下授都督嘗從獵甘泉宮
時圍人不齊獸多越逸周文大怒人皆股戰圍內惟一
鹿俄亦突圍走敦躍馬馳之鹿上東山敦棄馬步逐至
山半便掣之而下周文大悅諸將因得免責廢帝二年
拜驃騎大將軍開府儀同三司時岷蜀初開人情尚梗
巴西人熊淹據南梁州與梁西江州刺史王開業共為
表裏扇動羣蠻周文令敦討平之

周書曰時山路艱險人迹罕至敦身先將士攀木援崖倍道兼行乘其不意又遣儀同扶猛破其別帥淹乃與開業率其兵衆口累就梁王緄敦邀破之淹復依山立柵南引蠻帥向白彪為援敦設反間離其黨與後破之斬淹悉俘其衆

累進爵武都郡公尋為金州都督蠻帥向白彪向五子王等聚衆為寇圍逼信州詔敦與開府田弘赴救未至城陷乃進軍追討白彪等破之遂平信州是歲荊州蠻

帥文子榮自號仁州刺史復令敦與開府段韶討擒子榮并由其衆武成元年入為軍司馬陳將侯瑱侯安都等圍逼湘州逼絕糧援乃令敦渡江赴救敦連戰破瑱乘勝次湘州俄秋水汎溢江路遂斷糧援既絕恐瑱等知其糧少乃於營內多為土聚覆以米

周書曰集諸營軍士人各持囊遣官司部分若欲給糧者

召側近村人陽有訪問隨遣之瑱等聞之以為實敦又

增修營壘造廬舍示以持久相羅間遂廢農業瑱等無
如之何初土人亟乘輕船載米粟及籠雞鴨以餉瑱軍
敦患之乃偽為土人裝船伏甲士於中瑱軍人望見謂
餉舟至逆來爭取敦甲士出擒之又敦軍數有叛人乘
馬投瑱瑱輒納之敦又別取一馬諱以趨舟令舟中遂
以鞭鞭之如是者再三馬便畏舟不上後伏兵江岸使
人乘畏船馬以招瑱軍詐云投附瑱便遣兵迎接競來
牽馬馬既畏舟不上伏兵發盡殺之此後實有饋餉及

亡奔瑱者猶謂敦之詐並不敢受相持歲餘瑱等不能制求借舟送敦渡江敦慮其或許謂瑱使曰舍我百里當為汝去瑱等留舟於江將兵去津路百里敦覘知非詐徐理舟載勒衆而還在軍病死者十五六晉公獲以敦失地無功除其名保定五年累遷中州刺史鎮函谷敦恃功負氣顧其流輩皆為大將軍已獨未得兼以湘州之役全軍而反翻被除名每出怨言晉公護怒徵還逼令自殺臨刑呼子弼謂曰吾欲平江南不果汝當成

吾志吾以舌死汝不可不思因引錐刺弼舌出血誠以
慎言建德初追贈大將軍謚曰烈弼字輔伯少有大志
繞勇便弓馬解屬文博涉書記有重名周齊王憲聞而
敬之引為記室遷小內史與韋孝寬伐陳攻拔數十城
弼計居多拜壽州刺史隋文帝為丞相尉遲迥舉兵帝
恐弼為變遣長孫平馳驛代之及帝受禪陰有平江南
志訪可任者高頴薦弼有文武才幹拜吳州總管委以
平陳事弼忻然以為已任與壽州總管源雄並為重鎮

弼遺雄詩曰交河驃騎幕合浦伏波營勿使騏驎上無
我二人名獻取陳十策帝稱善賜以寶刀開皇九年大
舉伐陳以弼為行軍總管將渡江酹酒呪曰弼親承廟
畧遠振國威若使福善禍淫大軍利涉如事有乖違得
葬江魚腹不恨先是弼請緣江防人每交代時必集歷
陽大列旗幟營幕被野陳人以為大兵至悉發國中士
馬既知防人交代其衆復散後以常為不復設備及此
弼以大軍濟江陳人弗覺襲陳南徐州拔之執其刺史

黃恪軍令嚴肅秋毫不犯有軍士於民間酤酒弼立斬之進屯蔣山之白土岡陳將魯廣達周智安任蠻奴田瑞孔範蕭摩訶等以勁兵拒戰田瑞先犯弼軍擊走之魯廣達相繼逃進弼軍屢却弼揣知其驕士卒且情於是督厲將士殊死戰遂大破之麾下士開府員明擒摩訶至弼命左右牽斬之摩訶顏色自若弼釋而禮之叔北掖門入時韓擒虎已執陳叔寶弼至呼叔寶視之叔寶惶懼流汗股慄再拜弼謂曰小國之君當大國卿拜

禮也入朝不失作歸命侯無勞恐懼既而弼恚恨不獲
叔寶與擒虎相鈎挺刃而出令蔡徵為叔寶作降牋命
乘騾車歸已事不果帝聞弼有功大悅下詔褒揚之晉
王以弼先期決戰違軍命以弼屬吏帝驛召之及見迎
勞曰克定三吳公之功也命登御坐賜物八千段加上
柱國進爵宋國公真食襄邑三千戶寶劔寶帶金璫金
盤各一并雉尾扇曲蓋雜綵二千段女樂二部又賜陳
叔寶妹為妾

愚按陳後主一妹為宣華夫人一妹賜楊素又一妹
賜弼凡三見矣此宣華所以名大寶殿之禍也

拜右領軍大將軍平陳後六年弼撰其畫策上之謂為
御授平陳七策帝弗省曰公欲發揚我名我不求名公
宜自載家傳所上七策其一請廣陵頓兵一萬番代往
來陳人初見設備後以為常及大兵南伐不復疑其二
使兵緣江時獵人馬喧噪及兵臨江陳人以為獵其三
以老馬多買陳舟而匿之買弊舟五六十艘於濱內陳

人以為國內無舟其四積葦荻於楊子津其高蔽艦及
大兵將渡乃卒通濟於江其五塗戰船以黃與枯荻同
色故陳人不預覺其六先取京口倉儲速據白土岡置
兵死地故一戰而克其七臣奉敕兵以義舉及平京口
俘五千餘人悉給糧勞遣付其敕書命別道宣喻是以
大兵渡江莫不草偃十七日間南至林邑東至滄海西
至象林皆悉平定轉右武侯大將軍弼時貴盛位望隆
重其兄隆為武都郡公弟東萬榮郡公並刺史列將所

貯珍翫不可勝計婢妾曳綺羅者數百時人榮之弼自謂功名出朝臣右每以宰相自許既而楊素為右僕射弼仍為將軍甚不平形於言色由是免官弼怨望愈甚後數載下弼獄帝謂曰我以高顗楊素為宰相汝每昌言此二人惟堪噉飯是何意也弼曰顗臣之故人素臣之舅子並知其為人誠有此語公卿奏弼怨望罪當死上曰臣下守法不移公可自求活理弼曰臣恃至尊威靈將八千兵渡江擒陳叔寶竊以此望活帝曰此已格

外酬賞何用追論弼曰平陳之日諸公議不許臣行推
心為國已蒙格外重賞今還格外望活帝低徊數日惜
其功特令除名歲餘復其爵位帝亦忌之不復任使然
每宴賜遇之甚厚十九年駕幸仁壽宮譙王公詔弼為
五言詩詞意憤然帝覽而容之明年弼又有罪在禁所
詠詩自若帝數之曰人有性善行惡者公之為惡乃與
行俱有三太猛嫉妬心太猛自是非人心太猛無上心
太猛此心終不改邪他日帝謂侍臣曰初欲平陳時弼

謂高頴曰陳叔寶可平不作高鳥盡良弓藏邪頴云必不然平陳後便索內史又索僕射我語高頴曰功臣正宜授勲官不可豫朝政弼後語頴皇太子於已出口入耳無所不盡公他日安知不得弼力何脉脉耶意圖鎮廣陵又求荊州總管並作亂處此意終不改後突厥入朝帝賜之射突厥一發中的帝曰非弼無能當此乃命弼弼再拜呪曰臣若赤誠奉國當一發破的否則不中遂一發而中帝大悅顧謂突厥曰此人天賜我也煬帝

在東宮嘗謂曰楊素韓擒虎史萬歲三人俱良將優劣如何弼曰楊素是猛將非謀將韓擒虎是聞將非領將史萬歲是騎將非大將太子曰然則大將誰也弼拜曰惟殿下所擇意蓋自許為大將及煬帝嗣位尤被疎忌大業三年從駕北巡至榆林時為大帳下可坐數千人召突厥啟民可汗饗之弼以為太侈與太類宇文弼等私議得失為人所告竟被殺時年六十四妻子為官奴羣從徙邊子懷亮慷慨有父風以柱國世子拜儀同三

司坐弼為奴俄亦誅死敦弟誼性剛果有幹畧周文據
關中引之左右累遷儀同三司畧陽公府長史周孝閔
受禪厯原信二州總管及兄以讒毀誅坐免官從武帝
平齊拜洛州刺史封建威縣侯開皇中位左武侯將軍
海陵郡公後以突厥為邊患誼素有威名拜靈州刺史
進柱國誼時年老猶能重鎧上馬甚為北夷所憚數載
上表乞骸卒於家子舉襲

論曰周文帝屬禍亂之辰以征伐定海內大則連兵百

萬繫之以存亡小則轉戰邊亭不關於旬月是以兵無
少長士無賢愚莫不投筆要功橫戈請奮豆盧寧楊紹
王雅韓雄等或攀翼雲漢底績屯夷雖移年代而名成
終始美風哉豆盧勣譽宣分竹毓節見臨危可謂載德
象賢也觀德王位登台袞慶流後嗣保茲寵祿實仁厚
所致乎王世積雋才雖多適足為害賀若敦志畧慷慨
深入敵境勦寇絕其糧道江淮阻其歸塗臨危而策出
無方事迫而雄心彌厲故能利涉死地全師以反

周書曰非忘身殉國孰能若此俯窺

土不若

而茂勲莫紀嚴刑已及天下是以知宇文護之不終也
自南北分隔將三百年隋文爰應千齡將一函夏賀若
弼慷慨申必取之長策韓擒虎奮發賈勇勇以爭先隋
氏自此一戎威加四海稽諸天道或時有廢興考之人
謀實二臣之力其倣儻英畧弼固居多武毅威雄擒虎
稱重方於晉之王杜勲庸綽有餘地然弼功成名立矜

伐不已竟顛殞於非命亦不密以失身若念父臨終之言不及斯禍矣韓擒虎累業將家威聲動俗敵國既破名遂身全幸也廣陵甘棠咸有武藝驍雄膽畧並為當時所推赴赴干城難兄難弟矣